

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 437985 22 St
Tuzla, 24.09.2024.godine

OPĆINSKI SUD U TUZLI, stečajni sudija Vedran Milašinović, u stečajnom postupku nad imovinom društva „OPEL“ doo Lukavac, za trgovinu, ul. Armije BiH bb, u stečaju, koje zastupa stečajni upravnik Mirza (Rifat) Imamović, nakon provedenog stečajnog postupka, donio je dana 24.09.2024. godine slijedeće

RJEŠENJE

ZAKLJUČUJE SE stečajni postupak nad imovinom dužnika „OPEL“ doo Lukavac, za trgovinu, ul. Armije BiH bb, u stečaju, matični broj subjekta 1-3171, JIB: 4209424100006.

Rješenje će se objaviti na Oglasnoj tabli suda, WEB stranici suda, Službenim novinama FBiH, te dostaviti FIA.

Pravne posljedice zaključenja stečajnog postupka nastupiće po proteku osam dana od objavljivanja rješenja u „Službenim novinama FBiH“, a pravosnažno rješenje će se dostaviti Odjeljenju registra ovog suda, radi brisanja stečajnog dužnika iz sudskog registra.

Obrazloženje

Rješenjem broj: 32 0 St 437985 22 St od dana 10.07.2023. godine otvoren je stečajni postupak nad imovinom dužnika „OPEL“ doo Lukavac, za trgovinu, ul. Armije BiH bb.

U stečajnom postupku su kao stečajni povjerioci prijavili potraživanja PU F BiH KPU Tuzla u iznosu od 80.006,14 KM i JP Rad Lukavac u iznosu od 18.318,18 KM, koja su im u cjelosti priznata i svrstana u opšti isplati red. Iz izvještaja stečajnog upravnika i navoda datih na izvještajnom ročištu održanom dana 27.09.2023. godine proizilazi da stečajni dužnik nije imao u vlasništvu imovine iz čije bi se vrijednosti mogla namiriti potraživanja povjerioca niti troškovi stečajnog postupka, te da je u stečajnu masu prijavljen stambeni objekat označen kao suvlasnički dio 63/1309 na nekretnini u ulici Ratka Perića bb označenoj kao broj parcele 2478/3U2J16 povezano sa vlasništvom na posebnom dijelu zgrade-stanu ulaz C, sprat 2, broj stana 6, koji se sastoji od dvije sobe, kuhinje i pomoćnih prostorija, ukupne površine od 63 m², upisano u zk. ul. br. 8881 KO Lukavac, koji se u zemljišnoj knjizi vodio kao vlasništvo stečajnog dužnika, ali za koji je podnesen zahtjev za izlučenje Senaida Ikanovića. S obzirom da je iz dokumentacije proizilazilo da je u pogledu navedenog stana zaključen ugovor o udruživanju sredstava radi finansiranja izgradnje stambenog objekta, te da je cijena po tom ugovoru u cjelosti isplaćena mnogo prije otvaranja ovog stečajnog postupka, stečajni upravnik se izjasnio da priznaje zahtjev za izlučenje, shodno čemu je stečajni sud na ispitnom ročištu utvrdio osnovanim pomenuti zahtjev za izlučenje. Stečajni povjerioci nisu osporavali osnovanost pomenutog zahtjeva za izlučenje.

Dana 24.05.2024. godine stečajni upravnik je dostavio izvještaj u kojem navodi da nakon izlučenja pomenute nepokretnosti iz stečajne mase, ne postoji bilo kakva imovina iz koje bi se mogli finansirati troškovi stečajnog postupka, pa kako stečajni dužnik ne raspolaže sredstvima iz kojih bi se mogli podmiriti troškovi stečajnog postupka predlaže da sud sazove skupštinu povjerilaca koja će se izjasniti o daljem toku i zaključenju stečajnog postupka.

Na skupštini povjericaca održanoj dana 23.07.2024. godine je donesena odluka da se usvaja izvještaj stečajnog upravnika sa prijedlogom za zaključenje postupka zbog nedostatka stečajne mase za pokriće daljih troškova stečaja.

Odredbama člana 196 Zakona o stečaju (Objavljeno u "Sl. novine FBiH", br. 53 od 07 jula 2021) je propisano da ako se nakon otvaranja stečajnog postupka ispostavi da stečajna masa nije dovoljna za pokriće troškova stečajnog postupka, stečajni sudija će zaključiti postupak (stav 1), stečajni postupak se ne zaključuje ako se predujmi dovoljan novčani iznos (stav 2), a na postupak zaključenja stečajnog postupka primjenjuju se članovi 60 i 102 ovog zakona (stav 3).

Odredbaba člana 102 Zakona o stečaju je propisano da ako imovina stečajnog dužnika ne pokriva troškove postupka, a prijedlog je dopušten i osnovan, stečajni sudija će javnim pozivom, objavljenim na oglasnoj tabli suda, web stranici suda - elektronskoj tabli suda i u "Službenim novinama Federacije BiH", pozvati povjerioce i zainteresirana lica da u roku od 30 dana od dana objavljivanja poziva predlože otvaranje stečajnog postupka i uplate predujam za obezbjeđenje troškova stečajnog postupka, u iznosu koji odredi stečajni sudija (stav 7), a ako u roku iz stava 7 ovog člana povjerioci i zainteresirana lica ne predlože otvaranje stečajnog postupka i ne uplate predujam, stečajni sudija će otvoriti stečajni postupak i odmah zaključiti postupak (stav 8).

S obzirom na navedeno, sud je rješenjem od 24.07.2024. godine pozvao povjerioce i sva zainteresovana lica da u roku od trideset dana uplate određeni novčani iznos na ime pokrića troškova stečajnog postupka i da dokaz o uplati dostave sudu, a ukoliko niko od pozvanih ne postupi po rješenju da će sud zaključiti stečajni postupak. Navedeno rješenje je objavljeno u Službenim novinama FBiH broj 61/2024 dana 07.08.2024. godine.

Kako niko od pozvanih lica u ostavljenom roku, a niti do dana donošenja ovog rješenja, nije uplatio novčana sredstava na ime pokrića troškova stečajnog postupka, to su u smislu prethodno citiranih odredaba Zakona o stečaju ispunjeni uslovi da se stečajni postupak zaključi.

Temeljem odredbe člana 196 stav 3 i člana 102 stav 8 Zakona o stečaju, rješenje o zaključenju stečajnog postupka dostavlja se nadležnom tužilaštvu Tuzlanskog kantona, Poreznoj upravi FBiH i Upravi za indirektno oporezivanje BiH.

Na osnovu odredbe člana 206 stav 2 Zakona o stečaju, osnivač društva je dužan preuzeti arhivsku građu i istu predati nadležnom arhivu na čuvanje.

Nadalje, temeljem odredbe člana 204 stav 1 i 3, a u vezi sa odredbom člana 190 stav 10 Zakona o stečaju, rješenje se ima objaviti na oglasnoj tabli suda, WEB stranici suda, Službenim novinama FBiH te dostaviti FIA, dok je odredbom člana 204 stav 2 istog Zakona propisano da pravne posljedice zaključenja stečajnog postupka proizvode pravno dejstvo u roku od 8 dana od dana objave ovog rješenja u Službenim novinama FBiH.

Odluka o brisanju pravnog lica iz javnih registara temelji se na odredbi člana 204 stav 5 Zakona o stečaju.

STEČAJNI SUDIJA
Vedran Milašinović

Pouka o pravnom lijeku:

Protiv ovog rješenja je dozvoljeno izjaviti žalbu Kantonalnom sudu u Tuzli, koja se podnosi putem Općinskog suda u Tuzli u dovoljnom broju primjeraka, najkasnije u roku od osam dana od dana objavljivanja rješenja u Sl. novinama FBiH.

